

Buna sira, av salût, cari siùri.
Chi, fra noi, suma quasi 'n famìja:
tûta gent che 'sta sira l'è mnìja
per Gilindu, i pastùr, el Bambèn.

Però, prima 'd cmensè ra cumèdia,
aurèis propi parlè 'n cunfidènsa
'd tût la gent, se ch'la fà, se ch'la pensa
del facèndi ch'ùi càpita 'n gir.

E 'd facèndi ùi na càpita semper,
a uardè ad nutisij ùi n'è tonti:
noi parlùma 'nmà 'd culi 'mpurtònti,
ch'j'anterèsu la gent a cmè noi.

J'uma avì in ani gram, cari siuri,
brût andè 'n tonç afari, ch'us sapa:
ant in ani... cùì mora doi Papa,
i son robi che mè 'n n'ho mai vist.

J'avu Paolo VI, Montini,
e 'n brût dì u s'è savì la nutìsia
che 's brav Papa, l'amis d'la giùstìsia
e di pover, urmai l'era mort.

Ma, pasà pena gnonca du smon-ni,
'na gron roba u bsò sùbit ch'as sapa:
a j'hon pena che faç u nov Papa,
tûç i cùru a 'nvischè la Tivù.

E i vigh Albino Luciani,
suridènt an con tût la person-na
con 'na fàcia simpatica e bon-na,
ch'u salûta e pò 'l benedìs.

J'uma pena avì u temp ad cunòsli:
propi dèss, ant ist èpuca nèira,
a l'è staç cmè 'n bel dì 'd primaveira,
dop poc temp l'è vulà 'n Paradìs.

Da cuc mèis j'ùma Papa Woytjla,
l'è 'n polacco, el ven da luntòn,
ma 'na roba l'ha ausì sùbit dila
sensa gnònca spiciè fin a dmòn:

el nasiòn i son tûti prècisi,
Rùssia, Cina, Inghiltèra o la Frònsa,
ant el mond l'esist nent la distònsa:
suma avsèn, tûç amìs, tûç fradè.

A l'è propi 'na sonta person-na
e 'na roba vòj dila, csì cita:
augurùmij, tûç noi, longa vita,
a pens propi ch'ùi n'aba d'absògn!

U j'è pû l'onorevole Moro:
suma tûç me ch'l'è 'ndàç la facenda,
j'uma avì 'n gron magòn, po, sentènda
is afè cmè ch'l'è 'ndàç a finì.

U j'è u nov President an Italia,
a l'è nenta tont giùvu, pasiènsa,
ma l'è jèn ch'a l'ha tonta esperiènsa,
s' l'è 'n po' vegg, noi al tnùma l'istès.

Suma pràtich ad vegg a cà nostra
con Mafè ch'a l'ha tost 200 ani:
is ca chi a l'è bon da trè 'n Tani,
ma Pertini l'è 'n gomba da bon.

A camp David j'hon faç in tratàto
per finì tût cul guèri e cul loti,
dopo tonç ani ch'is dàvu del boti,
in tratàto fra Egìt e i Ebrè.

Us capìs ch'ùi n'è 'd cùì nent d'acòrdi:
per la pas nenta tûç i sa sbàsu,
tont an guèra j son j'ater ch'is màsu
e lur aç j fon sù 'n mûgg 'd miliòn.

Tûç j pàrlu 'd munèida europea,
'na munèida per tûç i paìs.
L'è 'na gron-na. Me 'd sold ai n'ho mèa:
andrò vendi i strachèn a Parìs!

Uj mancàva pò l'equo canòne
per rangè j afè di aç e 'nche j noster,
l'è 'n afari ch' l'è ciàr cmè l'inciòster,
per mé chënt j'ho capì nent d'u tût!

So che "equo" e "cavà" l'è medèsim,
el "canòne" l'è cul là ch'u spara,
va' savèj tût sa gent se ch' l'ampara
quond ch'j lèsu per strà j manifest!

Doi metàl j von ben per 'na lega,
laç e pana: j utènu la crèma,
ma 'n canòn e 'n cavà bità 'nsèma
se ch'is crèdu 'd fè sorti da là?

L'è 'na gron-na 'nche se mnì malàvi
col mà 'd cor, o l mà d'fidi, o l mà 'd ren-ni
perchè pò, quond ch'us trata 'd midsèn-ni,
i bsò semper fè i chënt co u tichèt.

E se jèn l'ha absògn d'in pò 'd pûrga,
l'è nent d'icia ch'el pòsa crumpèla:
la riceta u bsò semper purtèla,
sedinò 'l pò setès e... spiciè!

E gironda 'nt el vîj e 'nt el piàsi,
a uardùma 'nt la ghigna tûc j omi:
j son drèra a sarè i manicòmi,
al finìs che i pi mat suma noi!


Finalment el Marini 'l funsion-na
(el "Marini" l'è 'l "Municipale")
cuc mèis fa j'hon drubì, meno male!
L'è tront'anì ch'i divu ch' l'è pront.

E se noi pr'andè a senti 'n concerto
a spiciàvu d'andè 'nt u logiòne
per l'inìsi d'la nova stagione,
j'avu temp d'amnì vègg e 'd muri.

S'a uardèisu ùj n'è 'ncura di afari,
tonta roba u bsò gnonca pû dila,
e urmai chi l'è ura 'd finila
e ch'a cmènsu Gilindu da bon.

Av present'ra me gent, cari siuri,
tûç pastûr con del sûchi 'ngavgnàij
che s'i pîcu i trôn sù 'nche 'l miràij,
ma col cor semper bon e sincèr.

E uardònda ra nostra Cumèdia
ariù pûra con noi, divertìvi:
a j'ho diç tût cul ch'j ava da divi
e adès a cmensùma da bon.



Nando Campo - *Tirsi*.